

**LISTOVI...**

**GRAČANIČKI  
GLASNIK**  
časopis za kulturnu  
historiju

Broj 38, godina XIX  
novembar, 2014.

© Monos 2014

# Listovi gračaničkog kalendara (od 15. 5. do 1. 11. 2014.)

---

**Dr. sc. Omer Hamzić**

---

**15. 5. 2014.**

**Katastrofalne poplave: gračanički kraj  
pretrpio veliku štetu**

Usljed obilnih kišnih padavina, znatan dio sjevernog dijela Bosne i Hercegovine 14. i 15. maja su zahvatile nezapamćene poplave, koje su trajale nekoliko narednih dana. Iz svojih korita izlile su se rijeke Krivaja, Usora, Spreča, Bosna i Sava, sa svim svojim većim i manjim pritokama, potopivši brojna naselja i gradove. Posebno su stradali dio Žepča, te najveći dijelovi Maglaja i Doboja, gdje je voda dosegala do prvih spratova stambenih zgrada. Uslijed probijanja nasipa najveći broj gradova i sela Bosanske Posavine i Semberije se danima nalazio pod vodom (Modriča, Odžak, Šamac, Domaljevac, Orašje, Brčko i Bijeljina). Potpuno je uništena ljetina i **više od polovine** stočnog fonda. Danima su plutali leševi uginulih životinja po potopljenim stambenim naseljima u tom području.

Sprečko polje pretvoreno je u ogromno jezero, stradale se u mnoge kuće, takođe uništena ljetina, potopljeni



*Mjesna zajednica Lukavica, 17.05.2014. (FotoŠako)*

**LISTOVI...**



i oštećeni mnogi pogoni i drugi gospodarski objekti. Veliku štetu su pretrpjele firme: “Helioplast”, “Isowood”, Eko toplane, “Plamingo”, “Road” i dr. Potapanje glavne trafostanice u industrijskog zoni Gračanice izazvalo je trodnevni prekid snabdijavanja cijele općine električnom energijom, što je prouzrokovalo još veće štete u privredi, odnosno njenom nepotopljenom dijelu. U jednom trenutku, pojavile su se čak i glasine o navodnoj mogućnosti pucanja brane na jezeru Modrac, što bi dovelo do još veće katastrofe na područjima južno od Lukavca, ali to se, srećom, pokazalo kao potpuno neutemeljeno. Nažalost, one koji su u kritičnoj situaciji na takav način širili paniku i pronosili različite druge glasine (o stotinama mrtvih i sl.) niko nije pozvao na odgovornost. Obilne kišne padavine su aktivirale i brojna klizišta u skoro svim naseljima općine Gračanica, koja su prouzročila još veće štete i nevolje stanovništva...

**Štete na stambenim i gospodarskim objektima, uništenoj ljetini, putevima i dru- goj infrastrukturi su neprocjenjive. Iako su prirodne sile nepredvidljive, opća je ocjena**

da velika odgovornost leži u ljudskom faktoru: na području općine Gračanica, odbrambeni sistemi od poplava skoro da i ne postoje, sredstva namijenjena održavanju vodozaštitnih objekata troše se u druge svrhe, svijest stanovništva o prevenciji protiv prirodnih katastrofa je jako slaba (što svjedoče stalna začepjenja kanalizacionih odvoda, zapuštanje malih i velikih vodotoka, bacanje smeća i otpada u korita rijeka i potoka, različiti vidovi nelegalne gradnje na obalama itd).

**29. 5. 2014.**

**Vanredna i 20. redovna sjednica općinskog vijeća: o nastalim štetama prouzrokovanim prirodnim nepogodama na području općine Gračanica i aktivnostima koje se provode u cilju njihove sanacije.**

Nakon uvodnog izlaganja koje je podnio Mustafa Bajić, šef Službe za civilnu zaštitu općine Gračanica i stručne ocjene stanja klizišta, koju je obrazložio geolog Amer Džindo, čuli su se kraći izvještaji sa terena sa prijedlozima prioritarnih poslova na sanaciji posljedi-



ca prirodne katastrofe. Vijeće je zaključio da se hitno pristupi izradi i usvajanju rebalansa Budžeta Općine Gračanica za 2014. godinu, kako bi se osigurala sredstva za sanaciju šteta na komunalnoj infrastrukturi (putevi, vodovodi, kanalizacije i sl.), da se formira komisija od predstavnika svih političkih partija koje participiraju u radu Općinskog vijeća, kao i druga stručna tijela, koja će odrediti prioritete sanacije nastalih šteta, te podržalo formiranje centra za prikupljanje humanitarne pomoći u Gračanici. Osim toga, uputilo je zahtjeve višim nivoima vlasti, te nadležnim federalnim i kantonalnim javnim preduzećima i direkcijama, da poduzmu mjere iz svoje nadležnosti.

Nakon vanredne, održana je i 20. redova sjednica, na kojoj je osim Odluke o dodjeli ovogodišnjih općinskih priznanja (koja se dodjeljuju za Dan općine) usvojeno još nekoliko odluka, rješenja i izvještaja. Između ostalih, izdvajamo Odluku o izmjenama i dopunama Odluke o utvrđivanju značajnih datuma na nivou općine Gračanica, kojom se 1. septembar utvrđuje kao Dan formiranja

111./221. brdske gračaničke brigade, kao peti datum u općinskom kalendaru obilježavanja značajnih događaja. Usvojeni su i godišnji izvještaji o radu i finansijskom poslovanju javnih preduzeća “Vodovod i kanalizacija” (uz dosta polemike i pitanja), te “Komusa” i Veterinarske stanice Gračanica, Izvještaj o radu Općinskog pravobranilaštva, te Informacija o radu i vršenju nadzora općinskih inspekcija za 2013. godinu. Prihvaćen je i Izvještaj o provedenim podsticajnim mjerama u oblasti poljoprivrede na području općine Gračanica.

## **2. juni, 2014.**

### **Dan općine: bez uobičajenih manifestacija i proslave**

Pošto su zbog katastrofalnih poplava otkazani svi zabavni sadržaji, Dan općine Gračanica je obilježen skromno, svečanom akademijom, kojoj su prisustvovali gosti iz Francuske (delegacija bratskoga grada Fleury les Aubrais) i Italije, te francuski ambasador u BiH. Prigodan referat je pročitao općinski načelnik Nusret Helić, nakon čega su kao i svake godine dodijeljena tradicionalna općinska

priznanja: *Zlatna plaketa* dodijeljena je firmama "Alibegović plast" i "Zeka-comerc"; *Zlatna značka*: dr. Zlati Perović, Terzić Seadu i Zaketović Sanelu. Počasnim građaninom općine Gračanica proglašen je volonter i humanista Mario Fiorin iz Italije.

### 3.6. 2014.

#### **Gračanički glasnik – promocija 37. broja u Gračanici: "Sto godina od završetka Prvog svjetskog rata"**

Ovaj broj promovisao je dr. sc. Zijad Šehić, profesor historije na Filozofskom fakultetu Univerziteta u Sarajevu, koji je održao vrlo zanimljivo predavanje o uzrocima i posljedica Prvog svjetskog rata, čija je stota godišnjica bila povod za mnoge rasprave, diskusije i nova pitanja na mnogim kulturnim, naučnim i drugim institucijama širom Evrope. Osim prof. Šehića, kao gošće promocije svoje priloge (na istu temu) predstavile su i dvije saradnice "Gračaničkog glasnika" iz Sarajeva: Mina Kujović (Bošnjački institut) i Benjamina Londrc (Pravni fakultet).



*Detalj sa promocije 37. broja Gračaničkog glasnika*

### 17. 6. 2014.

#### **Vanredna sjednica Općinskog vijeća: procjena šteta od poplava u periodu od 5. 5. do 16. 6. 1914. na području općine Gračanica: 44.640.678,94 KM**

Kako je u svom uvodnom izlaganju rekao Općinski načelnik Nusret Helić, velike padavine koje su počele 13.05. i nastavile nared-

nih dana, dovele su do neviđenih poplava i izlivanja Spreče, Sokoluše i drugih rječica i potoka. Došlo je do prekida napajanja električnom energijom većeg dijela općine, nestanka vode, plavljenja oko 170 stambenih i 37 poslovnih objekata, preko 800 hektara poljoprivrednog zemljišta, krenula su klizišta, rušene kuće, prekinuti putevi, vodovodi i dr. Proglašeno je vanredno stanje i Općinski štab Civilne zaštite preuzeo rukovođenje odbranom od poplava i klizišta. Angažovana je gotovo sva raspoloživa mehanizacija i vatrogasna jedinica, ljudstvo, radnici poplavljenih i ugroženih firmi, građani u mjesnim zajednicama i dobrovoljci (u cilju odbrane i sprečavanja većih šteta). Sanirani su i prosijećani putevi, mostovi, sprečavano širenje klizišta, izmješteni ugroženi građani, uporedo su formirane ekipe koje su zajedno sa stručnim licima obilazile teren, davale upute i vršile evidentiranje šteta.

U skladu sa načinom i procedurom utvrđivanja šteta od prirodnih i drugih nesreća, koja je regulisana Uredbom o jedinstvenoj metodologiji i na osnovu izvještaja šest stručnih komisija koje su više od mjesec dana bile na terenu, Općinska komisija za procjenu šteta sačinila je jedinstveni izvještaj u kojem su utvrđene štete (izražene u KM) koje se odnose na: 1. oštećenje objekata saobraćaja i infrastrukture (3.757.000,95), i to: a) štete na putevima od klizišta (3.237.775,00), b) štete na putevima od poplava (97.200,00), c) štete na mostovima (423.000,00); 2. oštećenja građevinskih objekata (9.432.360,32) i to: a) oštećeni objekti od klizišta (8.502.320,52), b) oštećeni objekti od poplava (930.039,80); 3. štete od klizišta i poplava na poljoprivrednim kulturama i zemljištu (14.144.595,00) i to: a) štete na poljoprivrednim kulturama (3.388.430,00), b) štete od klizišta na građevinskom, poljoprivrednom i šumskom zemljištu (10.756.165,00); 4. štete na vodoprivrednim objektima (5.961.200,00) i to: a) vodotoci-čišćenje i regulacija (5.859.000,00), b) vodoopskrbni objekti, instalacija i oprema

(102.200); 5. *preduzete mjere na sprečavanju zaraznih bolesti* (91.245,00) i to: a) JZU Dom zdravlja–dezinfekcija stambenih objekata (52.000), b) JP Veterinarska stanica–dezinfekcija privrednih objekata (35.525,00), c) Teritorijalna vatrogasna jedinica Gračanica (3.290,00), d) JP “Komus” (630,00); 6. *troškovi odbrane od prirodne nepogode* (298.483,62); 7. *štete na industrijskim objektima* (10.954.820,00) i to: a) direktne štete na objektima, sirovinama, robi (5.308.720), b) indirektne štete–izgubljena dobit, kašnjenje u isporuci i sl. (5.646.100,00)

Ovaj izvještaj je prihvaćen, uz konstataciju da će se u narednom periodu neminovno morati dopunjavati i korigovati u skladu sa novim saznanjima, spoznajama ili uputama viših nadležnih organa, što znači da ukupno procijenjena šteta na 44.640.678,94 KM nije konačna.

### 17. 6. 2014.

#### **Gračanički glasnik – promocija 37. broja na Fakultetu islamskih nauka u Sarajevu**

Tako je realizovana već duže vremena prisutna, inicijativa da se izdavački projekat “Gračanički glasnik” predstavi i na ovoj visokoškolskoj ustanovi. Domaćin promocije bio je akademik Enes Karić, profesor FIN-a, inače saradnik Časopisa, koji je pohvalio na-



*Akademik Enes Karić - detalj sa promocije 37. broja “Gračaničkog glasnika” na Fakultetu islamskih nauka u Sarajevu*

pore Redakcije da održi kontinuitet i zavidan stručni nivo njegovog sadržaja. O projektu “Gračanički glasnik”, njegovoj misiji i dosadašnjim rezultatima govorio je glavni i odgovorni urednik Časopisa dr. sc. Omer Hamzić, a potom su na temu ovog broja “Stotinu godina od početka Prvog svjetskog rata”, predstavljajući svoje radove, govorili dr. sc. Zijad Šehić, profesor Filozofskog fakulteta Univerziteta u Sarajevu, i saradnice Časopisa iz Sarajeva: Mina Kujović (Bošnjački institut) i Benamina Londrc (Pravni Fakulteta).

### 30. juni 1914.

#### **21. sjednica općinskog vijeća: vijećnici odbili interventna sredstva za sanaciju posljedica poplava od Vlade FBiH u visini od 35.000 KM**

Na sjednici je dominiralo pitanje visine interventne finansijske pomoći koje je općini Gračanica dodijelila Vlada Federacije BiH. Načelnik općine je uputio oštar prigovor Federalnoj vladi na visinu sredstava, ističući da su neke druge općine dobile desetostruko veći iznos, što su podržali i vijećnici i jednoglasno usvojili zaključak da se ponuđeni iznos demonstrativno odbije. Među vijećnicima se, tako, iskazalo zajedništvo – kakvo je u kriznim situacijama zaista potrebno, al je zanimljivo da ni vijećnici opozicije nisu postavili pitanje zašto je baš i na osnovu kojih izvještaja Vlada FBiH donijela odluku o tom iznosu, da li baš ta vlada (u kojoj sjedi i jedan Gračanlija!) namjerno “diskriminira” Gračanicu (kako su to neki u javnosti pokušavali predstaviti), te ko je, zapravo, odgovoran za izvještaje koji (ni)su podneseni Vladi. (Par dana kasnije, premijer FBiH Nermin Nikšić je izjavio da je Vlada donijela odluku o raspodjeli sredstava na osnovu dokumentacije koja joj je u tom trenutku bila na raspolaganju, te da je tek naknadno primio izvještaje iz kojih se vide prave razmjere štete na općini Gračanica).

U nastavku sjednice, usvojena je Odluka o izmjenama i dopunama Budžeta općine

Gračanica za 2014. godinu koja je, kako je rečeno, uslijedila iz više razloga, među kojima su navedene i poplave. Usvojen je i Poslovnik Općinskog vijeća Gračanica, a potom i nekoliko odluka i rješenja. Između ostalih i Odluka o izuzimanju državnog kapitala iz postupka privatizacije JP "Komus" d.o.o. Gračanica, kojom se otvara postupak reprivatizacije ovog preduzeća i Odluka o broju i visini stipendija za učenike srednjih škola i studenata u školskoj 2014/2015. godini po kojoj će se dodijeliti 84 stipendije.

Odlukom nisu obuhvaćene stipendije učenicima i studentima iz porodica kojima su srušeni objekti od poplava i klizišta jer će se dodjeljivati po posebnoj proceduri. I dalje će godišnja stipendija za studente iznositi 1.200, a za učenike srednjih škola 600 KM. Usvojene su i dvije informacije o inspekcijском nadzoru iz oblasti radnih odnosa sa brojem pregleda i poduzetim mjerama kod pravnih i fizičkih lica na području općine Gračanica u 2013. godini i o stanju okolice na općini Gračanica sa osvrtom na način odlaganja komunalnog otpada, koja je izazvala nešto veću pažnju vijećnika.

### 1. juli 2014.

#### **Gračanički glasnik – promocija 37. broja u Arhivu Tuzlanskog kantona**

U povodu obilježavanja stote godišnjice od početka Prvog svjetskog rata, ali i 60 godina uspješnog rada i postojanja Arhiva Tuzlanskog kantona, u prostorijama Arhiva otvorena je izložba "Prvi svjetski rat u dokumentima i fotografijama Arhiva Tuzlanskog kantona", a potom održana i promocija 37. broja Časopisa za kulturnu historiju "Gračanički glasnik", koji je tematski posvećen Prvom svjetskom ratu. O časopisu su govorili dr. sc. Izet Šabotić, dr. sc. Omer Hamzić i profesor Edin Šaković.

### 23. juli 2014.

#### **Obilježena mubarek noć Lejletu-l-Kadr: zajednički iftar za građane na terasi Osman-kapetanove medrese u Gračanici**

Najznačajnija noć u islamu, "Noć vrijednija od 1000 drugih mjeseci" (Kur'an), ujedno i jedan od najsvečanijih blagdana u islamskoj tradiciji Bošnjaka, obilježen je na svečan način i u Gračanici, što je bila i centralna svečanost mubarek mjeseca Ramazana. Članice udruženja "Gračaničko keranje", sa svojim su saradnicima i prijateljima organizirale zajednički iftar za građane na terasi Osman-kapetanove medrese, spremivši velike količine tradicionalnih bosanskih jela, čime su nastavile tradiciju započetu ranijih godina. Poslije iftara održan je i vjersko-kulturni program, na kome su, izvođenjem ilahija i kasida, nastupili horovi Udruženja žena Pribave, i Omladinskog udruženja "Sijedi Krš" iz Ba-



bića. Poslije teravih-namaza, u većini džamija na području Medžlisa Islamske zajednice Gračanica održani su svečani programi, uz prigodna predavanja, obraćanja, učenje Kur'ana i izvođenje ilahija.

### 25. juli 2014.

#### **Protesti radnika u Gračanici**

Sindikata "Grafopaka" organizirao je mirne proteste radnika ove tvornice, zbog teških problema sa kojima se suočavaju (neisplaćene plaće, neuvezan radni staž, nedostatak zdravstvenog osiguranja itd.). Radnicima "Grafopaka" su se pridružili i radnici nekoli-

ko drugih gračaničkih preduzeća koji se suočavaju sa sličnim problemima. Radnici su se okupili u centru grada, a potom su se protestnom šetnjom uputili prema Općini, kao i privatnim stanovima stečajnih upravnika, čije su ostavke tražili. Protesti su protekli mirno i bez incidenata.

**31. juli 2014.**

### **Svečano otvorena novouređena Zavičajna muzejska zbirka u Gračanici**

Otvaranjem novouređene postavke zavičajne muzejske zbirke u Bosanskom kulturnom centru počela je tradicionalna kulturna manifestacija “Ljetne večeri pod lipama Gračanice”. Radi se o galerijsko-muzejskom prostoru koji je poslije rata izgrađen kao “treća faza Doma kulture”. Prva muzejska postavka u tom prostoru otvorena je 2006. godine, kasnije je više puta preuređivana, da bi naposljetku ostala samo privremenog karaktera. “U proljeće ove, 2014. godine, uprava BKC-a je odlučila uraditi novu stalnu postavku Zavičajne muzejske zbirke Gračanica, ovaj put u čvrstom uvjerenju da ona ostane zaista stalna, kao jedan od redovnih i nezaobilaznih sadržaja u kulturnoj i turističkoj ponudi Gračanice, ali i jedan od važnih elemenata u oblikovanju lokalnog identiteta i imidža našeg grada i općine”, rekao je na otvaranju novouređene stalne postavke direktor BKC Nedžad Peljto. Postavku je posjetiocima predstavio njen autor, prof. historije Edin Šaković, a službeno je otvorio općinski načelnik Nusret Helić.

**5.-6. avgust 2014.**

### **Nova katastrofa u Gračanici: povodanj Sokoluše**

Obilni pljuskovi i kišne padavine ponovo su zadesile širi gračanički kraj, prouzročivši bujice i izljevanje vodotoka. Kasno uvečer, 5. avgusta, zbog izljevanja potoka u Donjoj Orahovici je poplavljen velik broj stambenih



*Protesti radnika u Gračanici (fotografija: Radio Gračanica)*

objekata, a zbog izljevanja vode na kolovoz obustavljen je i promet magistralnim putem M4 (Tuzla – Doboј). U toku noći i u zoru, 5./6. augusta, došlo je do prave katastrofe u Gračanici. Vodostaji Sokoluše i Drijenče su porasli za nekoliko metara. Voda je tekla i pojedinim gradskim ulicama. Potok Japaga je začepio kanalizacioni otvor i izlio se, te je ulicama Potok-Mahala i Ahmed-paše Budimlije, sve do Skvera, tekla prava bujica. Zbog visokog vodostaja Sokoluše, poplavljen je bio i najveći dio ulice Riječka. Rijeka Drijenča je također bila nadošla (voda se preljevala preko mosta kod Štamparije). Stanje je najteže bilo u donjem dijelu grada, nizvodno od ušća Drijenče, gdje se voda izlila i poplavila velik broj stambenih objekata. Pješački most na Lukama se, zbog nanešenog otpada, faktički



pretvorio u branu, što je preusmjeravalo tok bujice nižim terenom u pravcu jugozapada, plaveći prizemlja kuća, gospodarskih objekata i privrednih pogona. Naročito teško je stradala gračanička tvornica namještaja "Jadrina", u kojoj su potpuno poplavljena postrojenja i skladišni prostor, te uništena ogromna količina reproto-materijala i gotovih proizvoda, što je ovoj, inače uspješnoj firmi nanijelo nesagledive štete.



(fotografija: Radio Gračanica)

## 7. avgust 2014.

### Civilna zaštita: izvještaji o štetama

Prema preleminarnim procjenama u izvještaju Općinskog štaba Civilne zaštite, ukupne štete na području općine Gračanica uslijed nepogode od 5.-6. avgusta iznose oko 30 miliona KM. Srušeno još 13 stambenih objekata, oštećeno od poplava i klizišta 277, evakuisano 859 ljudi, poplavljeno (osim onih u maju) još 30 privrednih objekata, aktivirano 60 klizišta i dr. Ovoga puta najveće su štete na privrednim objektima i infrastrukturi. Štab je donio zaključak da Dom zdravlja i Veterinarska stanica Gračanica izvrše dezinfekciju i deratizaciju privrednih objekata. Osim toga, u Domu zdravlja su za građane obezbijeđeni materijali i uputstva za samostalno djelovanje. Prema posebnim naredbama, u naredna dva dana izvršit će se hitne intervencije na vodotocima – čišćenje i produbljivanje korita, te nužna sanacija putne mreže

## 11. avgust 2014.

### Avgustovske poplave gore od majskih: apel za pomoć Općine Gračanica

Usljed ponovnog nevremena i obilnih padavina, od 5. – 9. avgusta, podivljale rijeke i potoci u mjesnim zajednicama, te Sokoluša i Drijenča u Gračanici, izazvale su nove go-

leme štete na skoro cijeloj teritoriji općine. Najviše je stradala Gračanica s industrijskom zonom, te mjesne zajednice Donja Orahovica, Miričina, Rašljeva, Gornja Orahovica i dr. Poplavljeno je više od 300 stambenih objekata i više od 30 preduzeća, presječeni su putevi, porušeno ili oštećeno 20-ak mostova, pokrenuta su nova klizišta, a štete su procijenjene na više od 27 miliona KM ili ukupno s majskim oko 71 milion KM. Situacija na općini je dramatična. Načelnik općine je putem medija uputio apel za pomoć, zamolivši za donacije u hrani, finansijskim sredstvima, građevinskom materijalu i dr.

## 17. 8. 2014.

### Uz prisustvo nekoliko hiljada građana sa područja Gračanice i šire okoline, svečano otvorena novosagrađena džamija u Donjoj Orahovici – Džemat Centar

Džamija ima površinu preko 500 m<sup>2</sup>, a uz prostor za obavljanje namaza su i gasulhana, abdesthana, biblioteka, te nekoliko poslovnih prostora. Gradnja džamije je započela 2006. godine, ukupna vrijednost ulaganja iznosi oko 700.000 KM. Specifičnost ove džamije su i dvije munare, te je ona za sada jedina džamija s dvije munare na gračaničkom po-

dručju. Svečanom otvorenju prisustvovali su: muftija bihački Hasan ef. Makić, kao izaslanik Reisu-l-uleme, te mr. Mensur ef. Husić iz Behram-begove medrese, kao izaslanik Muftije tuzlanskog, zatim glavni imam Medžlisa Islamske zajednice Gračanica Smajo ef. Mustafić, predsjednik Medžlisa Islamske zajednice Gračanica dr. Admir Brkićević, te načelnik općine Gračanica Nusret Helić, uz brojne imame i druge ugledne ličnosti iz javnog života. Službeno otvorenje džamije je obavio muftija Makić, uručivši ključeve džamije predsjedniku građevinskog odbora Safetu Hasiću i supružnicima Ševki i Remzi Karić, kao najvećim donatorima u izgradnji džamije.

### **21. avgust 2014.**

#### **Posjeta kantonalnog i federalnog premijera Gračanici: obećana pomoć**

Premijer Federacije BiH Nermin Nikšić i premijer Tuzlanskog kantona Bahrija Umihanić su sa svojim saradnicima posjetili Gračanicu, gdje ih je primio načelnik općine Nusret Helić, koji je goste bliže upoznao sa razmjerama šteta pretrpljenih u prirodnim nepogodama, naglasivši da općina očekuje pomoć sa viših nivoa vlasti. Obojica premijera su obećali založiti se da se općini Gračanica, kao jednoj od najteže stradalih u zadnjih nekoliko mjeseci, pomognu što je moguće više. Poslije sastanka u općini, upriličena je posjeta firmama koje su najviše stradale u majskim i avgustovskim poplavama.

### **23. avgust 2014.**

#### **Novo nevrijeme: led veličine teniske loptice nanio ogromne štete istočnom dijelu općine Gračanica**

U popodnevnom satima žestoka oluja se obušila na područje općine Gračanica, sa obilnom kišom i gradom, uslijed čega je došlo do naglog podizanja razine vodotoka, pa i njihovog mjestimičnog izlivanja. Najteže je ipak bilo u dijelovima Donje Orahovice, Rašljeve i Miričine, gdje je padao led veliči-

ne teniske loptice, pričinivši ogromnu štetu na preko hiljadu krovova stambenih, gospodarskih i javnih objekata, kao i na više automobila. Nekoliko osoba je tom prilikom povrijeđeno, a prizori iz Donje Orahovice, sa porazbijanim crepovima i potpuno uništenim krovovima i staklima, uveliko je podsjećao na slike iz vremena agresije...

### **27. avgust 2014.**

#### **Islamska zajednica donirala 100.000 KM za stanovništvo općine Gračanice, pomoć stiže i sa drugih strana**

Potvrdu svoje društvene odgovornosti Islamska zajednica BiH je iskazala i značajnom donacijom u iznosu od 100.000 KM, iz sredstava Bejtul-mala, na ime hitne novčane pomoći stanovništvu ugroženih područja općine Gračanica. Iznos je uplaćen na račun Općinskog fonda za sanaciju šteta. Tim povodom općinu su posjetili muftija tuzlanski Vahid ef. Fazlović, u pratnji premijera TK Bahrije Umihanića, gdje ih je primio načelnik općine i izrazio zahvalnost za pruženu pomoć. Muftija Fazlović je tom prilikom istaknuo da ovo nije ni prva ni posljednja akcija Islamske zajednice i Muftijstva tuzlanskog u pomoći stanovništvu BiH, posebno onom slabijeg imovinskog stanja. Pomoć u ime Vlade TK je obećao i premijer Umihanić. Narednih dana, donacije u novcu i građevinskom materijalu su pristigle i sa drugih strana: izdvaja se donacija sindikata Elektroprivrede u vrijednosti od 50.000 KM, donacija općine Novo Sarajevo u iznosu od 10.000 KM i dr.

(Fotografija: Radio Gračanica)

### **28. avgust 2014.**

#### **22. sjednica Općinskog vijeća: zabrinjava pad prihoda za prvo polugodište 2014.**

Prema usvojenom izvještaju, prihodi Budžeta za prvih 6 mjeseci ove godine ostvareni su u iznosu od 4.598.648 KM ili 80,22 % i manji su od plana za blizu 1.200.000 KM. Uku-

pni budžetski izdaci iznose 4.158.739 KM ili 72,55 %, pa je "uknjižen" izvjestan suficit, jednim dijelom prenesen iz ranijeg perioda, a drugi iskazan u vidu namjenskih sredstava za još nerealizovane projekte. Navedeni podbačaji službeno se obrazlažu kao posljedica prirodnih katastrofa i poplava u proteklom periodu, posebno iz PDV. Mnoga preduzeća pretrpjela su velike štete, na duže ili kraće vrijeme prekidala rad, izgubila tržište itd. Pošto se ovakav trend očekuje i u narednom periodu, u skladu s tim, morat će se kresati i rashodovna strana Budžeta. Uskoro će uslijediti i njegov rebalans, ne samo zbog ovih podbačaja, već i zbog pristizanja novčane pomoći općini iz raznih izvora za sanaciju šteta od poplava, što će uticati kako na prihodovnu, tako i na rashodovnu stranu općinskog Budžeta. Osim Budžeta, od važnijih pitanja kojima su se vijećnici bavili na ovoj sjednici, spomenimo Izvještaj o realizaciji programa kapitalnih investicija općine Gračanica 2010.-2014., za 2013. godinu, kao i Izvještaj o provođenju lokalnog akcionog plana i zaštite životne sredine općine Gračanica 2012.-2017., za 2013. godinu.

### 30. avgust 2014.

#### Otvorena džamija na Hajdarevcu (Gračanica)

Pred nekoliko hiljada vjernika s područja Gračanice i šire okoline, ali i drugih dijelova Bosne i Hercegovine, u gračaničkom naselju Hajdarevac svečano je otvorena novosagrađena džamija, koja je svojom skladnom arhitekturom ukrasila južna predgrađa Gračanice. Džamija je zamišljena kao dio budućeg islamskog centra, koji podrazumijeva izgradnju još nekoliko pratećih objekata. Kamen temeljac za ovu džamiju položen je 2009. godine, a namaz se u njoj počeo obavljati 2011. godine. Program svečanog otvorenja je započeo u petak, 29. avgusta, učenjem mevluda i prigodnim predavanjem, uz veliko prisustvo vjernika, a nastavio se sutradan, prije podne, obraćanjem imama džamije Edin ef. Dedića, predsjednika građevinskog odbora Amel ef. Nurikića, te predsjednika Medžlisa Islamske zajednice Gračanica Smaje ef. Halilovića i predsjednika dr. Admiru Brkičevića, kao i načelnika općine Gračanica Nusreta Helića. Nakon njih prigodne govore su održali muftija tuzlanski Vahid ef. Fazlović i voj-



ni muftija Ismail ef. Smajlović, izaslanik Reisu-l-uleme, pozvavši prisutne na jedinstvo i zajedništvo, te istaknuvši važnost izgradnje vjerskih objekata i pokazivanja suosjećanja sa svima koji se nađu u nevolji. Muftija Smajlović je potom džamiju proglasio otvorenom, uručivši ključeve supružnicima hadži Mesutu i hadži Emini Husanović, kao najzaslužnijim džematlijama u njezinoj izgradnji, koji su i otvorili džamiju. Svečanosti otvorenja su prisustvovali brojni ugledni gosti, vjerski dužnosnici, te brojne ličnosti iz društvenog, političkog i javnog života, kao i predstavnici kulturnih institucija Islamske republike Iran, te Ambasade Republike Turske u BiH. Inače, džamija je izgrađena na lokalitetu nekadašnjeg vakufskog zemljišta, zvanog Hadžaševog greblje, na mjestu gdje je prema maglovitoj narodnoj predaji nekada davno, prije više stotina godina, stajala mala drvena džamija.

### **30. septembar 2014.**

**Održana 23. sjednica Općinskog vijeća: usvojen Program zbrinjavanja građana i pomoći u obnovi i izgradnji stambenih zgrada ugroženih poplavama i klizištima u vrijeme prirodne nesreće na području općine Gračanica.**

Ovaj Program bio je i centralna tačka dnevnog reda na ovoj sjednici Vijeća, koji je nakon obrazloženja i manje diskusije jednoglasno usvojen. Druga tačka dnevnog reda odnosila se na osnivanje Komisije za razmatranje prigovora, što je također jednoglasno usvojeno. Usvojeni program i rješenje stvorili su pretpostavke da se utvrde kriteriji i provedu procedure za dodjelu prvih sredstava za objekte stradale u elementarnim nepogodama.

### **19. septembar 2014.**

**Vanredna sjednica Općinskog vijeća Gračanica: o prirodnim nepogodama i šteti**

Na sjednici su razmatrane dvije tačke dnevnog reda: Informacija o prirodnoj nepogodi od bujica, poplava, klizišta i grada koja je po-

godila područje općine Gračanica u avgustu 2014. godine i poduzetim mjerama na zaštiti i spašavanju ljudi i materijalnih dobara, te Izvještaj o procijenjenoj šteti od prirodne nepogode koja je uzrokovala pojavu poplava, klizišta i leda na području općine Gračanica u periodu od 17. 06. 2014. do 01. 09. 2014. godine, sa pregledom ukupnih šteta od maja do avgusta (sve tri prirodne nepogode). U raspravi su predložene i usvojene određene dopune (zahtjev prema Vladi FBiH za finansiranje projekata iz sredstava zajma od Svjetske banke, hitna regulacija korita vodotoka i davanje ovlaštenja načelniku općine da u hitnim slučajevima može mobilizirati raspoloživu mehanizaciju za sanaciju šteta), nakon čega je Informacija jednoglasno usvojena. Slično je bilo i sa drugom tačkom dnevnog reda, koja je također jednoglasno usvojena, uz zaključak da komisija koja je pripremila Izvještaj isti dopuni sa nekim podacima o štetama koji nisu bili obuhvaćeni.

### **12.-13. oktobar 2014.**

**Održani Opći izbori: ubjedljiva pobjeda SDA**

Opći izbori u Gračanici su održani u mirnoj atmosferi, uz generalno, prilično skromnu i dostojanstvenu kampanju, s obzirom na ukupne okolnosti u kojima su održani. Predizbornih plakata i drugih propagandnih materijala je bilo relativno malo, u odnosu na ranije izbore, kao i masovnih predizbornih skupova. U centru grada, tokom kampanje, predstavili su se DF i SDP, uz učešće predsjednika dotičnih stranaka i kandidata za bošnjačkog člana Predsjedništva (Željka Komšića i Emira Suljagića, odnosno Zlatka Lagumdžije i Bakira Hadžimerovića). Predizborni skup na otvorenom je imao i SBB, uz učešće svog lidera i osnivača Fahrudina Radončića, također kandidata za člana Predsjedništva. SDA se opredjelila za skromniju varijantu, održavši centralni skup u sali BKC-a, bez učešća visokih stranačkih dužnosnika i gostiju sa strane (s izuzetkom

Amira Fazlića iz Gradačca, nosioca liste za Parlamentarnu skupštinu BiH). Izlaznost na izbore je bila relativno veća nego na nekim prethodnim izborima i za područje općine iznosila je 56,5%. Preliminarni rezultati su se znali već u kasnim noćnim satima sa 12. na 13. oktobar. SDA je ostvarila ubjedljivu pobjedu za sve nivoe vlasti, sa – kako su pokazivali rezultati koji su pristizali sa biračkih mjesta – 1000-1500 glasova razlike. SDP je doživio neočekivan pad, koji je iznenadio izborni štab ove stranke, dok su značajan uspjeh postigli novoformirana DF i populistički SBB. Ostale stranke zabilježile su skromnije rezultate.

## 22. oktobar 2014.

### **Ministarstvo prostornog uređenja TK dalo saglasnost na Prostorni plan općine Gračanica: omogućeno širenje proizvodnih i poslovnih objekata u Sprečkom polju.**

Neusklađenost prostornih planova općine i kantona onemogućavala je izdavanje građevinskih dozvola i druge potrebne dokumentacije poslodavcima zainteresiranim za širenje proizvodnih i prerađivačkih pogona. Bio je to još jedan primjer maćehinskog odnosa državne birokracije prema privredi, kao pokretaču svakog razvoja. Iako je ovaj problem već duže vremena izražen na našoj općini, ponovno je aktueliziran pred Općinskim vijećem u posljednjih par godina, inicijativama Esada Tursunovića i Mirze Omerdića, dvojice vijećnika iz Stjepan Polja, mjesne zajednice u kojoj je više firmi bilo suočeno sa ovom preprekom, a u njegovo rješenje se uključila i općinska administracija, predvođena načelnikom općine Nusretom Helićem. Usaglašavanje kantonalne i općinske planske dokumentacije konačno je riješilo problem koji je do sada kočio višemilionske investicije na području općine Gračanica, a time i otvaranje brojnih novih radnih mjesta.”

## 30. oktobar 2014.

### **Održana 24. sjednica Općinskog vijeća Gračanica: usvojeni Izvještaj o izvršenju budžeta Općine Gračanica za prvih 9 mjeseci 1914. i nacrt Budžeta za 2015. godinu**

Nakon kraćih rasprava Izvještaj je usvojen, a Nacrt Budžeta upućen na javnu raspravu koja će trajati do 5. decembra 2014. godine. U nastavku sjednice jednoglasno su usvojene Odluka o prenosu prava vlasništva na nekretninama u vlasništvu Federacije BiH, kantona, gradova i općina na nastradalim područjima licima kojima je usljed prirodne nesreće trajno onemogućeno korištenje stambenog prostora, zatim dvije odluke o promjeni statusa nepokretnosti u opštoj upotrebi, rješenja o razrješenju i imenovanju predsjednika i člana komisije za budžet, te Ažuriranje programa kapitalnih investicija općine Gračanica 2010.-2014., u 2014. godini.

## 31. oktobar 2014.

### **Socijalni dan u Gračanici: projekt “Volontiraj-kreditiraj”**

U Gračanici je organiziran Socijalni dan u okviru projekta “Volontiraj-kreditiraj 2014”, kojeg na području naše općine već drugu godinu zaredom realizira Udruženje mladih “Anea MG”, u saradnji sa gračaničkim srednjim školama, poslodavcima i Općinom. Ukupno 65 učenika Gimnazije i Mješovite srednje škole imalo je priliku steći jednodnevno radno iskustvo u privrednim subjektima, javnim ustanovama i organima javne uprave. Osnovni cilj projekta jeste jačanje kapaciteta mladih, kako bi bili u mogućnosti preuzeti odgovornost za svoju profesionalnu budućnost. Akciju su podržale firme: “Plamingo”, “Variplast”, “Fragmat”, “Zeka komerc”, “Drvostil”, “Bingo”, “Kismet”, “Olimp”, “Brezije”, “Kovan”, Gradska apoteka, Dom zdravlja, Računovodstveni servis, “Džambo” i “Tring”, zatim BKC i Radio Gračanica, kao i Općina.